



PRINS HUUB IV

Blief neet zitte
aanne kantj
mer surf mèt door
't Moerlandj

Vastelaovundj 2003

JEUGDPRINS LUUK
JEUGDPRINSES LISAN


Laotj de bal mer rolle
en kômptj mèt ôs
drie daag dolle



PROKLAMASIE VAN PRINS HUUB IV



Ich, Huub IV, prins van het Moerland
 Geboore en getooge Moereboeëk, woeënendj aanne Scheijvenstraot in Ell
 Bewoeëner vanne buurt Kunnenkoel
 Aod-veurzitter, ieërelid en leider van het Kinjervakantiewerk
 Mede-oprichter en veurzitter van het Jeugdwerk
 Bestuurslid vanne vastelaovesvereniging
 Lid van het jeugdcomité en de Kwakel
 Als hieël get jaore deilnûmmer aanne bôntje aovundj
 Altieëd met de naas veuraan alsder get te doen is
 In de tieëd dae ich euver hûb systeem- en netwerkbeheerder in Born
 Leefhûbber van ein good glaas beer en sjaele zeiver



Bie de gratie vanne Raod van Elf, laot uch het volgendje weete:

Als 52° prins staon ich neet aanne kantj
 Mer zal ich regeere euver het Moerlandj

Daobie roop ich eederein op: bleeftj mèt dees
 daag neet aan hoeës
 Mer dootj mèt ôs mèt, in de orde van de moeës

Als prins laot ich mich steune door mieën twee adjudante
 Ard en Rob
 En auch die gaon der tegenaan en zètte de zaak oppe kop

Dit jaor trèkke wae de ker en hopelik bin ich
 dao-in net zoeëne kei
 Wie miene veurganger Prins Ley

Hopelik hûbbe die vanne Niesgoet het neet te kwaod
 Mer de Scheijvenstraot weurdj dit jaor ômgeduipjt tót
 Prinsenstraot

De muziek is belangrieëk
 want geine muziek det zoj eederein stuuere
 Dus muzikante, paktj met die daag uch instrumente
 en laotj uch huure

Den weurdj auch de prinselike receptie
 ein groeët kabaal
 En dae gaon wae haoje, det is gein verrassing,
 hie inne zaal

Nao de optocht kieke wae noeë al oet, det is zeker
 Mer de prins en adjudante doon dit jaor neet mèt
 veur de wisselbeker

Auch dit jaor oppe bontje aovundj
 bin ich weer verkleidj
 Neet als prins, mer als artiest,
 Tis mèr det gae det weitj

Met de adjudante, jeugdprins Luuk en
 jeugdprinses Lisan laup ich veurop
 En eederein dae bleeftj zitte houw ich
 met de moeër op oppe kop

Ich wins uch allemaol eine geweldige vastelaovestieëd,
 groeët en klein
 En bleeftj met dees daag allemaol
 gezôndj en waal oppe bein



Blief neet zitte aanne kantj
 Mer surf mèt door 't Moerlandj



WEURDJE VANNE PRINS

Altieëd hûb ich gedacht: asdet ze mich as prins vraoge den zèg ik nae. Tis al drûk genôg mèt die daag. Mer jae, den waers-se gevraagd, steis effe mèt de moeël vol tenj en ein paar oor later hûbsse veur dich zelf als ein beslissing genoome. Det doon ich! En den begintj het pas good, diverse bie-einkômste mèt het prinse-comité, adjudante zeuke, veurbereidinge treffe veur het oetkômme, klei-er bie-ein zeuke, foto's maake, ein proklamasie maake mèt ein presentatie en nog veul mieër. En det lûptj allemaol gelieëk mèt de normale zaake; 't jeugdwerk, 't jeugdcomité, 't bestuur vanne carnavalsvereniging, de veurbereidinge veur de boontje aovundj en de jeugdboontje-middig, het werk en dien privé-laeve. Noeët gedacht det het zoeë drûk kôs waere. Mer waal leuk! En den môs se hieël veurzichtig zeen det neemes get inne gaate kriegtj, want in ein dûrp as Ell hûbs-se de kal zoeë rôndj gaon. En het allerleukste is: wie dichter bie het prinsebal kûmptj, wie mieër minse zich gaon aafvraoge weem det prins weurdj. Zelf duisse auch duchtig mèt aan het verspreide van namen van minse die het waal ins zooje kinne waere. Jao, mer neet dit jaor. Dit jaor bin ich het. En gelûkkig hûb ich twee gooj adjudante (en neet te vergaete Angelique van Ard), die mich tot noeë toe al hieël veul geholpe hûbbe. Wae hûbbe d'r zin in en hopelik gae auch. Wae winse uch den auch allemaol hieël plezeerige daag, veul sukses met alle veurbereidinge en bleeftj veural neet zitte aanne kantj, mer surf mèt door 't Moerlandj. Alaaf!

Èrpel rape.

Mia vanne Eertwegh haaj èrpel gesjeldj en ze efkes boete gezatte òm ein of anjer reje. Noe haaje die kleinkinjer det inne gate gekrege en die èrpel bie Lowie van Brunister inne hoof gegoeëjt. Mia haaj nao get kort speurwerk heur èrpel dao zeen ligge. Ze môst dus bie Lowie aanne veurdeur gaon vraoge of-se bie hum inne hoof heur eige èrpel mocht gaon rape



advertentie

BOEFIE

Dé specialist
in kinjerklei-jing



Abraham (1)

Harry vanne Tup is lèst 50 gewore dus dao sting dae daag auch keurig netjes eine echte Abraham inne hoof. Thea van Beurskens leep dae aovenj nao De Prairie en zaag dae Abraham dao zitte. "Det is eine sjoëne Abraham" dacht Thea tevreje. Ein paar mèter verderop zaag Thea bie Wilke vanne Vin nog eine Abraham op ut benkske zitte. "Och wat toch leuk, zoeë twieë Abrahams vlak bie dein en danger inne buurt" dacht Thea, ut deej-um gewoeën good. Mer toen ze nog get korterbie dae twieëde gekomme waas bleek det det Bér vanne Tuut te zeen.

advertentie

Gaotj-der ins get dèkker op oet

Bieveurbieëldj nao
De Bachelorclub



Waarsjuwing!

Eva van Jos en Nelly kwaam toes mét heure noewe vriendj. Ze waarsjuwdje dae jông det pappa de minse waal ins veur de gek hêltj. "As-ter niks zeet den hêltj-ter dich nog veur de gek!" haaj Eva gezagdj.

advertentie

Veur appele en paere
Gaotj nao Moors of nao Koppen



vers vanne baum



C.V. De Boorebuuk
Secr. mrw. T. Koenen - Custers
Kunnen beemd 4
6011 PB Ell

HD7P6011PB4

B325B104 H601101

WEEM ZAL UT ZÈGGE.

De brief hiebove waerdje nao Tiny en Evert gesteurdj door ut secretariaat vanne Serdelhunj. De vraag is noe; zeen Tiny en Evert lid van ein geheime vastelaovesvereniging mèt de naam "De Boorebuuk", of weite de bure in Hunsel nog steeds neet det wae in Èll "De Moerebuuk" heite ??

Ein net maedje.


Jos vreugtj op ein gegaeve moment aan Hub, "weem is det maedje dao?". "Kin-se det neet", zeet Hub, "det is ut maedje van Peter van Toeëm". Jos; "Det is neet verkieërdj woeë Peter mèt geit, det is nog ein net maedje". "Jao", zeet Hub, "det danktj-dich de koekoek, dae heet tied zat gatj òm emes te zeuke, wae hùbbe vlotter môtte beslisse!".



advertentie



VAKLAN



Spaarkas lichte.

Jeanne de Louw is op ein gegaeve moment de spaarkas aan ut lichte. leverig sjriefjtj-ze op weem waat gespaartj heet. Mer auch weem neet, want den môs-se boete betale. Heur beurs heet-ze naeve zich ligge want se môt neet vergaete zelf auch nog te spare zoeëgauw as-ze bie heur nummer kumtj. Hieëlemaol in gedachte werktj-ze door en blijftj-ze alles netjes notere. As-ze oeteindelik de kas weer aafgeslote heet kumtj-ze tot de òndèkking det-ze toch nog vergaete is òm zelf te spare. Ze heet zichzelf toen mer ein boete gegaeve. Moraal van dit verhaal; allein ieërlieke minse moge de spaarkas lichte.

advertentie

Baumkwekerie Moors



STERK IN STAOL



DERCKX STAOLBOUW



Wisj-djer al det ..

- Matje van Siem ziene inkel heet gebroke naeve de rups mèt de kèrmis
- hae zoeë zaat waas det-se nog twiefeldje of-se hum drek koste operere
- Bèr en Nel auch waal ins flink op stap gaon
- de kleier van Nel den naat waere as Bèr toes môt pisse
- Mies van Evers auch 50 is gewore
- Hae noe nog mieër stömme zeiver geit verkauep
- chocomel mèt kiene goodkauper is as-se met ein bôn betaals
- mèt de kirmis de sigare op reklaam wore
- ut bie de Prairie binne nog noeëts zoeë mistig is gewaestj
- Piet op ein gegaeve moment trots tege Sjeng vertèldje det hae opa weurdj
- de twieë meugelikke paetoeëmes bie de veterane voetballe
- Siem nog steeds op die melodie van det vastelaovesleedje zingtj; "... ich bin mien mûs kwiet ...", in plaats van "... ich bèn mien mûts kwiet ..."
- Mart wist te vertèlle det-ter die mûs weer gevonje heet
- Siem oppe Aoje Limburger eine misse haaj?
- hae dae misse ôngertusse dik ingehoordj heet
- Tjeu van Hoke eine kieër nao ut kiene bie Siem en bie Tjeu ging kieke of Suzy missjien nog dao waas
- Suzy namelik de draadloze mikrefoon van ut kiene mèt haaj genome
- de dèrdje wanjeltocht vanne volleybalvereniging Bach weer ein groeët succes waas mèt 639 deilnummers
- det die van Bach ut dao sjenbaar neet mèt ins zeen
- daorôm dae tocht in 2003 wéer veur de dèrdje kieër gehaoje weurdj volges de advertentie
- Mart en Rian ederein bie de pueëj haaje
- nemes wist det-se ein jaor geleje stiekem getrouwdj wore
- Mart en Rian al veur 11 november oetgerope wore as Prinsepaar
- Mia van Gieëne mèt eine teijer mèt aete aanne straot kwaam staon, zoeë blie waas-ze
- Mia reep nao ederein dae ut woeëj huëre "Zoeë fijn bie os inne straot!"
- Giel minstes ein tòn moeëre op de oprit haaj opgekieptj en Jan neet blie waas mèt zoeëveul huij dao inne hoof



advertentie

prinse-resepsie

Wae hùbbe de ièr uch oet te nuuje veur de resepsie van
 prins Mart S, prinses Rianne en jeugprinse Josje
 op zunig 3 november oppe Sebastiaanstraat 44 te
 Eil van 14.00 tèt 16.00 oor.

En det onger mien motto. As desse stiekum geis trouwe, zulse det later berouwe.



mook

moterôngerdeile

Vrintjelicke pappegeij.

Bie Thea kwaam eine hoeëge Piet vanne KNVB op bezeug en twieë leje van ut bestuur van de voetbalclub, Jos van Lemme en Dick Goldenbelt. Thea bracht die minse nao de hoeskamer en ging toen zelf effe trûk nao de keuke veur ut ein en anger.

Inins vreugtj Paco de pappegeij "Môs-se koffie?" Dae man vanne KNVB haaj neet inne gate det die pappegeij det vroeg en zagt "Ja, graag mevrouw"



Ein mupke

"Mam", baedeltj Lars op ziene verjaordaag, "maag ich in béd laeze tot ich in slaop val?".
"Veur mien paart", zeet mam, "mer gein minuut langer!"



advertentie



*'T is al goud
wat blinktj
bie de*
GOLDCORNER

Effe helpe mèt achteroet rieje.

'Dames 3' van ôs volliebalvereniging Bach SV haaj eine oetwêdstried in Maris. Zoeë-as gewueënik weurdj den verzameldj Bie Siem en van dao oet vertrokke. Mèt parkere van autoos weurdj den neet zoeë nauw gekeke. Bie Siem en bie de Garant Markt steit den alles vol en sjots en sjeif. Toch woeëj Karin van Orbon heure auto auch nog der tûsse kriege, mer dae van Christianne van Roy stông inne weeg. Nicol zaag det en ging Karin helpe door achter de auto te gaon rope "Ja, kôm mer ... zèt mer trûk ... kôm mer ... ja ... achteroet ...". Nicol leep mèt achteroet mer haaj neet inne gate det ôngertûsse eine angere auto vanoet de angere kantj auch op die plaats aan ut parkere waas. Dus Nicol ging mer door mèt Karin "Ja, kôm mer ... kôm mer ...". Tot op ein gegaeve moment eemes reuptj "Nicol, lèt op!!". En Nicol innegang "Godv...", dae riedj mich euver miene inkel, aaahhhh ...". Ut resultaat waas ; lachendje minse, eine blauwe inkel, mer waal de wêdstried gewônne met 4-0 !.



Ut kômpjoetertiedperk

Peter, nog mer net verhoesdj nao ziene noewe stek, woeëj ein stûkske sjrieve veur ut clubblad vanne voetbalclub. Hae haaj-der zin in, dus hieël fanatiek ging-der achter ziene kômpjoeter zitte. Det stûkske môst daezelfdje aovendj nog aaf want de termien veur ut inlevere van stûkskes zôj dae daag verlaupe. Hae ging snel aanne gang en ein hieël pagina vol waas ut resultaat. Noe nog effe oetprinte (internet-verbinjing haaj-der nog neet) en den snel inne bûs duuje. Mer shit, woeërm kuntj-ter niks oet dae printer? Peter begos ut al get werm te kriege. Waat is-ter noe weer aanne handj mèt det dink? "Den zèt ich det stûkske mer op diskette", dacht hae, "merre wie môt det auch alweer?" Peter kreeg ut steeds werm en werm en dao kwaam al get zweijt op zien kop te staon. Niks lûkdje. Waat noe gedaon?

Oeteindelik heet-ter det stûkske mer euvergesjreve op pepeer en bie Henk inne bûs geduutj. Toen heet-ter Henk opgebeltj en gezagdj det-ter ein stûkske inne bûs zaat veur in ut clubblad. Hae vroeg innegang of Henk det effe kost emailen nao de redaksie! Om half twieë snachs haaj Henk toen det stûkske weer euvergetieptj inne kômpjoeter en doorgesteurdj nao de plaats van bestumming. Vanne goodheid van minse môs-se ut hûbbe is waal ins dèkker gezagdj ...



advertentie

Champignonkwekerie Koolen



Veur de bèste champignons

advertentie

Hûbtj gae last
van uch spiere
in de bein of inne nek.
Den is Beekman
de juuste plek.



advertentie

HENDRIKX-VAN GEMERT



BESTRAOTINGE



Ein mupke

Jantje kumtj mèt zien rapport toes;
"Blief rûstig zitte pap, det hûb-ich auch
gedaon ...".

Kin-se Éll-s ; antjwoorde veurig jaor.

Veurig jaor zeen wae gestartj met de rubriek "Kin-se Éll-s ?". Wae veule de minse in Éll aanne tandj euver Eller weurdjes die wae gelukkig nog gebroeke. Veural de jeugd ônger ôs dage wae oet ôm mèt te doen. Wae hùbbe al gehueêrdj det sômmige hulp vraoge bie opa of oma, dao is niks mis mèt nateurlik.

Hie ônger de Nederlandse vertaling van veurig jaor waat auch de bedoeling waas. Mer sômmige minse hùbbe heur bèst gedaon op ein 'platte' vertaling, zoeë good en sjoëen det wae uch det neet wille ônthaoje.



Ein hieëp



Ein gaos



Zûk



Eine slieps



Ein ônzeiksel

Ut weurdje Waas is / zeen ;	Nederlandse vertaling die wae bedoole	Nederlandse vertaling die wae NEET bedoole	En wae bedoole ZEKER NEET dees vertalinge
Ein hieëp	Een hakmes	Een nijptang, Een (hand)bijl, Een mes	Vrouw met haar op tanden
Ein meule	Een molen		
Ein gaos	Een gans	Gras	
Huidkieës	Hoofdkas, Zult	Lelijke kaas	Kieës tûsse de tieëne
Eine nistel	Een (schoen)veter	Stekelige plant	
Ein bluts	Een bult, Een goedaardig persoon		Mijn zus
Karboet	Balkenbrij		Kar die buiten staat
Eine sjöttelsplak	Een vaatdoek		Medalje van een schutter
Ein kalebas	Een boodschappentas	Dikke meloen	
Eine doorslaag	Een vergiet	Een doorslag(?)	Als Doortje haar man slaat
Sjoon	Schoenen	Mooi	
Zûk	Sokken	Zoek	
Ein ieske	Een ijsje		
Haose	Handschoenen		'Housse'
Ein klak	Een pet		Café in Tungelder
Eine reek	Een riek	Een hooivork	Iemand die giftig is
Sjroeëp	Stroop		
Ziesjöttel	Melkzeef	Trechter voor op de melkbus	Schotel opzij van het huis
Ein snoterbel	Een snottebel (snot uit de neus)	Kleine jongen	Groen uit neus
Nate sieke	Natte voeten (sokken)	Natte sik, Vochtige laarzen	
Eine winjel	Een zwachtel	Harde wind	
Ein ônzeiksel	Een mier		Als je valt bij het plassen
Ein flies	Een (hand)tasje	Een valies, Een trui	
Ein mesjen	Een machine		Dikke vrouw
Eine sjolk	Een schort	Een schulk(?)	Vertaler
Stevele	Laarzen		
Eine troog	Een trog, Een voederbak	Een eetbak voor varkens	Dikke vrouw
Ein nondedjuke	Een vlinderdas(je)	Een strikje	Iemand die veel vloekt
Eine slieps	Een stropdas	Onbetrouwbaar persoon	





Waat is hie aanne handj?

- A. Heet deze mins last van sjerp leegt?
- B. Is-ter de microfoon aan ut aete?
- C. Is-ter ziene pas aan ut zeuke?
- D. Heet-ter moeëreboekpien?



advertentie



Gein geldj mieër
inne tes mèt dees daag.
Laup den mer bie
de Rabobank nao binne.
Want dao kins-se
daag en nacht pinne.

Ein mupke

De zeke; "Och dokter, ich bin zoeë bang veur de operasie. Ut is mien ieëste". "Ich kan uch hieël good begriepe", zeet dae dokter, "mien auch!".



advertentie

Zeuktj gae ein struukske, ein buimke of ein plentje veur inne hoof of achter de lamelle



Den môtj gae zeker ins bie
Linders of Verhaag aanbelle

Raodj de foto.



Mèt welk beroep hùbbe wae hie te make?

- A. Is dit ein vekieërdj maedje?
- B. Is dit eine travestiet?
- C. Is dit Mieke vanne Hennes?
- D. Is dit ein Alpha-hulp?



Waat is Jan hie aan ut doon?

- A. Is-ter aan 't spraeke of aan 't zinge
- B. Wae hope aan 't zinge
- C. Want aan toesprake haoje môt-ter dudelik nog winne
- D. Hae kumtj neet tot de kern



Weem is deze mins?

- A. Is dit eine zwerver?
- B. Is dit eine geitehoeder?
- C. Is dae ûrges weggelaupe?
- D. Is dit eine bekindje Eller mins?



Woeë geit-dit euver?

- A. Is dit ein advertentie van Hans Anders?
- B. Zeen dit Toos en Nel?
- C. Zeen dit Bassie en Adriaan?
- D. Hùbbe dees minse auch traone inne boks?



advertentie

Elltaria



Gewueën de lekkerste friet en
snacks
Auch veur complieëte sjöttels

Oetstepke kapsters

De kapsters van Iris Haarzaak ginge eine daag nao Rotterdam. Dao waas namelijk eine haormodesjoo en aangezeen de dames gaer op de hueëgdje blieve van de lêste moeëde haaj Iris veur al zien medewerkers kaart gekocht veur de sjoo. Op maandjig, heure rûstdaag, ginge ze richting Rotterdam. Iris, zelf gebore en getoge in Rotterdam, booj aan om te rieje, want het wist de weeg oet zien jeugd nog good. De dames haaje ôngerweeg veul plezeer en dao waerdje hieël get verteldj en gelache. In Eindhoven kwome-ze in ein file terecht. Karin vroeg zich aaf of de hieële rink volstông, woeë-op Iris zegt "det veltj waal mèt, de rink is zoeë groeët neet". Volges Iris wore de rink van Eindhoven en Rotterdam zoeë-get aeve groeët. Einmaal Eindhoven door leep alles weer gesmeerdj. Inne buurt van Rotterdam aangekômme begos-ut dao auch al drûk te waere. Anke vroeg zich helop aaf of al die minse nao de haorsjoo zooje gaon. Iris kreeg ut knap werm, want inne laup van jaore waas toch ein en anger veranderdj in Rotterdam en zaag-ut ter allemaol net get anges oet as waat Iris nog wist. Langzaam mer zeker waerdje de dames get zenewechtig want de sjoo zoj euver 20 minute beginne. Iris kalmeerdje de dames door te zegge as-se op de rink zote, ze der zoeë wore. Door al det gedoons waerdje de gooje aafslaag gemistj en Iris kreeg ut steeds werm en dao versjene auch al get zweitruppelkes op heur kûpke. "Geine paniek", zegt Iris, "effe snel de rink rondj en de gooje aafslaag pakke, den zeen wae nog op tied". Nao ein poeës gereje te hûbbe zeet Karin; "dae rink van Rotterdam is volges mich toch get groeëter den dae van Eindhoven". Nao ein paar keteer euver de rink gesjeurd te hûbbe haaje-ze nao de derdje kieër de gooje aafslaag te pakke en kwome-ze toch bie de zaal aan. Gae raodj-ut al, de sjoo waas afgelaupe! De dames zeen toen mer gezellig gaon winkele, ze môtte toch ûrges de frustrasies aan kwiet. Volges de lêste berichte zeen ze tweeë maandj later toch nog nao ein haormodesjoo gewaesj, mer toen mèt de trein



advertentie

OASIS
BLOEM - KUNST - KADO



Veur as gae
eemes anges
of uchzelf
wiltj verrasse

advertentie

Wiltj-gae noew tegelkes
aanne moor?
En gae kintj det
zelf neet doon?



Den nao Peter v.d. Eerthweg.


Aod iezer (1).

Jan van Lemme kwaam aod iezer bringe bie de sjutterie en bleef met ziene vinger urges aanne hange. Hae bloodje wie ein verke. Ze gove-hum bie de sjutterie gauw eine handjook om ut bloje te stoppe. Zeet Wim van kessels "dae zeen wae nooëts mieër trûk!". noew weite wae neet wat Wim bedoeldje, dae handjook of Jan ?????



advertentie

**SLEGTERIE RUUD EN
MARLEEN HEJKERS**



Vers vleis
Kantj-en-klaor gerechte
Barbecues
En nog veul mieër



truck color design




Ein mupke

Sjang tege zien vrouw; "Det is mich te veul, eder jaor ein kindj. In ut vervolg gaon ich bove oppe zûlder slaope". "As-doe meins det det helptj, zèt ich mien béd auch daobove nieër" zeet zien vrouw.



In ut zekehoes.

Tim van André Benders en Conny laag in ut zekehoes en kreeg op ein gegaave moment bezeug van eine cliniclown. Dae clown haaj veur alle kinjer get gemaaktj van balonne. Noe vroeg Tim aan dae clown of-ter auch ins mocht probere get te make mèt die balonne. Tim hoofdje nateurlik neet te 'probere' want hae mook de sjoeënste dinger. Dae clown veel de moel ope van verbazing en vroeg-hum wie det toch kos. "Wat wil-se as-se ut toes mèt de paplepel ingegaave kriegs", haaj Tim gezagdj, "mien vader is auch eine clown!".



advertentie

auch al stiet mèt dees daag alles oppe kop
!!
mienne service stiet althied veurop !!

Tenieltechniek
Hub van Lunte

advertentie

Reparaties,
auto's
twieëdehands
of noew



Gaotj nao
Garage
Heemels
haer



Spraeke of verspraeke?

Nel van Lei van Deckers waerdje ôngersjeje met ein lintje vanne Keunigin. Det ging gebeure bie de Prairie. Ederein sting-der veur klaor en op ein gegaeve moment kumtj de bûrgemeister binne mèt zien gevolg en Jan van meister Zef duit ut woord. Hae felisiteerdj Nel mèt zoeëveul verdeenste veur de 'vrouwenbôndj', of sorry, veur de 'vrouwen organisasie'.

Mer Jan toch, dit hêtj tegewoordig 'Zij Actief'! Waal dien hoeswerk make as-se nao huldiging môs!



advertentie

Gaotj-der ins get dèkker op oet

Bieveurbieëldj nao
De Prairie



Is der get neet in orde met
eur kat of eure hondj.
Snel nao de dierenkliniek
want dao make ze die
weer gezôndj

Oetsleeg Vastelaovesoptocht 2002 van CV De Moerebuuk

1e pries + wisselbeker mèt 72,5 puntj.

(En auch 1e pries klein groepe)

De Blue Band: "Wae doon mèt veur de gekke yen"



2e plaats mèt 65,5 puntj.

(En auch 2e plaats klein groepe)


Mini Goldenbeld, Annie Huyskens en Toos Peeters: "Wae laupe inne kantj"



3e plaats mèt 65 puntje.

(En auch 1e plaats bie de wages)

De Brandjblussers: "De Euro steit noe vast"



Woeë baeje al neet good veur is.



Op eine sjoëne zunigmiddig in mei dacht Lemme An; "ich fiets nao Thoeër nao de kepel veurdet de kinjer om half veer kômme koffiedrinke". Ze pômpdje de benj op en smeerdje de këtting, deej de snelbinjers recht en ging met ein vaart van eemes van 88 jaor richting Hunsel. Normaal stiktj-ze in Hunsel aan ut voetbalveldj drek euver nao links òm oppe fietsepaad te kômme. Mer det ging noe neet want dao kwome autoos achter heur dus môst-ze waal nao rechts en wachte tot de autoos langs wore. Mer omdet ze dao neet op getêldj haaj en keihel fietsdje ging-ut mis. Ze kwaam neet op tied stil en vloog toen tege ein plestiek pûlke, klaats dao laag-ze. Ein paar minse die dao auch stônge te wachte holpe heur op en vroege of ze gein pien haaj. "Nae, nae, niks aanne handj", zacht An. Mer ôngertûsse haaj-ze ein knie zoeë dik wie ein voorkrot (sônger lauf). Ut ergste van alles waas nog det heure pentie kepot waas. Ze bedanktje de minse veur de hulp, leet nog get autoos langs en ging richting Ittervoort. Nao ein paar honger maeter dacht ze; "waat rieje die autoos mich toch allemaal geruisloos veurbie?". Ze veultj aan heur oëer ... "mer verdikkeme, mien hueërapparaat verlore! Mer det raap ich dalik waal op as ich heives gaon". In Thoeër aangekômme geit ze hômpeleltj de kepel binne en haeltj ein handj oppe knie (det nemes zaag det-ze eine kepotte pentie haaj). Ze stook tweeë kaese op bie ôze lieve vrouw van altied dorendje biestandj en baedj tot Sint Teunis det ze dalik heur hueërapparaat vindj. Ze stoptj heure tesplak in ut wiewatersbekske en veugtj daomèt ut blood van heure knie. De pien waas drek ein stuk minder. Toen ging-ze weer nao boete en gelukkig stông heure fiets nog tege de moor. Mer good det ze oppe trûkweeg windj-in haaj en neet zoeë hel kost fietse anges waas-ze missjien weer gevalle. Wie ze in Hunsel kwaam heet-ze ein hieël poeës op eine knie nao ut hueërapparaat gezocht, mer neet gevonje. Toen ze verder fietsdje nao Éll heet-ze nog veer weesgegreetjes veur Sint Teunis gebaerdj, want An dacht; "baadj ut neet, sjaje duit-ut auch neet. En ônger ut fietse hub ich toch niks anges te doen". Toes aangekômme zat ze vlaai en koffie oppe taofel, want ut waas haost half veer. Jos en Nelly kwome as iêrste. Moeder vertêldje heur verhaol en Nelly zacht drek; "wij gaon zuuke". Jos en Nelly de auto in en nao Hunsel. Ut begost te rengele en Nelly bleef inne auto zitte en Jos ging



zeuke nao det hueërapparaat. Nao vijf minute en ein paar nate veut kumptj Jos trûk. "Niks te vinje", zeet-ter. "Dan zal ik eens gaon", zeet Nelly. Twintig seconde later is Nel trûk inne auto met het hueërapparaat. "Toen ik uutstapte heurde ik ut al piepe", zeet Nelly. "Oh, zacht Jos, "det zal waal det ich ut neet kost vinje, ich haaj det van michzelf neet aanstaon ...". Ze reje weer nao Éll en moeder waas zoeë blie mèr heur hueërapparaat det ze gein pien mieër veuldje. Ut veurval waerdje aan alle twelf kinjer doorvertêldj en hie en dao get aangediktj. Daorôm is-ut oeteindelik dit verhaol gewore.

advertentie

VEUR ALLE VERZEKERINGEN



NAO LEON KNAPEN

AUCH VEUR
UCHE HYPOTHEEK



Ein fleske wien
of ein kretje beer
Of ein anger drenkske
veur toes

Bacchus heet
vanalles in hoës



Oetstepke.

De road van elluf ging op 20 juli eine daag droet. Ein zoeëgenaamdje zomertoer door de gemeindje Hunsel waerdje geplendj. Ze vertrokke allemoal same met de hoefker. Allein Judy neet, die is de hieële daag met de heftruuk wëggewaestj. De vroeg blijftj; wist-ze ut neet of kost Judy ut woord hoefker neet oetspraake.



advertentie



Hûbtj gae geine
talenknobbel

Custers
Taaladviezen
heet dae waal

KEPPER

Clown
Goocheliëer
Artiest
Entertainer
En nog veul mieër



Bèste minse van ut Moeërelandj,

Waat geit ein jaor toch snel veurbiej. Vastelaovendj 2002 is veur ôs of waas-ut nog gistere. Wae hûbbe genote van alles waat eine Prins moog mètmake. In ein paar waeke hûbbe wae eine heftige tied doorgemaaktj, woeë-in wae veul entoeziaste reaksies hûbbe moge ervare van veul minse, van jônk toet aod. Ut waas ein belaevenis ôm noeëts te vergaete! Wae wille vannoet dees plaats den auch ederein bedanke dae ôs heet geholpe ôm der zoeë eine fantastiese vastelaovendj van te make. Hiebij wille wae de adjudante Har en Mies, mèt heur dames Annie en Lia, en de leje van de Raod met vorst Jan toch speciaal effe aanhole.

Tenslotte hope wae det de noewe prins en prinses van 2003 net zoeë eine sjoëne vastelaovendj steit te wachte.

Moerebuuk bedanktj!

Prins Ley en Prinses Annie



advertentie

Veur as uch loeënwerk
Snel, good en neet deur



Dao hûbbe wae Harrie v/d Looy toch veur

De mik, de brueëdjes, de vlaai
Alles is dao zoeë lekker

Natuurlik bie Thijs,
Ôze werme bekker



advertentie

MAKELAARDIJ VAN LIESHOUT



As gae de koeëj wiltj verkaupe
Of As gae ein anger optrêkske zeuktj



Schoonheids-
specialiste

Jeanne v/d Hagen

As gae der nog knapper oet wiltj zeen

COMPLIT

belettering

Pascal en Leon Knapen

Henjig.

De vader van Marleen van Ruud vanne slegter geit op eine zaoterdig nao de bekker ein vlaaj met slaagraum hole. Ut waas pas kwart veur twee, mer de slaagraumspuit waas al zuver gemaaktj. Dus gaaf Francien, zoeë henjig as-se is, de slaagraum los in ein mikketoet mèt.



Ut leektj.

Deze titel duit get anges vermoede as waat ut is. Marlies van Baolders ging mèt EKO op stap. EKO is de Eller Kelpen Oler kegelclub. Ze woore bie de iërste koffiestop wie Mia van Wim vanne Geut tege hum zeet; "Marlies, doe môs ins nao de WC gaon, want volges mich is-ter get neet good". En jao hueër, Marlies haaj ein lekkage van God weit wie groeët. Ze haaj nateurlik nûrges op geraekentj en der môs get geregeldj waere. Dao hong waal eine automaat mer of de duvel der mèt speultj, nemes haaj eine euro bie zich. Ein hieël gedoons tot ze eine euro haaje gewisseldj. Marlies dacht; "hé, hé waat ein gedoons". Het stopdje geldj inne automaat en dacht-ter maandjverbandj oet te hole. Mer ze maaktj ut pekske open en zaat-ter ein kepotje in. Marlies kwaam neet mier bie van ut lache. Ze môste dus weer ein muntjstuk van eine euro hûbbe. Toen mer weer goan wissele en daonao oplette det de gooje automaat gebroektj waardje. Gelûk bie ein ongelûk haaj Tiny vanne Kapper ein zuiver ôngerbôks bie zich die Marlies mocht lieëne. Om neet te zieër veur sjût te laupe heet Marlies zich de jas ômgebônje terwiel ut dae daag blootheid waas. Ze hûbbe ondanks alles toch nog eine sjoëne daag gatj.



HANJEL.

Bart de Louw en Maan van Teun zote bie de Prairie aanne bar mèt Éll-kirmis. Ze haje net de spaarkas geligtj. Bart dacht slum te zeen en meindje te wete det Maan altied veul spaardje. Toevallig haaj Bart eine aoje auto te kaup. Zeet-ter tege Maan; "Maan wil-se die envelop ruile tege miene auto?". Woeë-op Maan zeet; "joa, is good". "Oh", dacht Bart, "det is vlot verdeentj". Tot hae de envelop ope deej en zaag det-ter nog ein boete môst betale van 26 euro.



Aod iezer (2).

Bie de sjütterie haaje-ze de sjofel van Harry van Looy gelieëndj veur de zwaor spulle inne wage te kriege. Det haaj de hieële daag good gegange tot Tjeu van Hoke zich ter mèt bemeudje. Dao waardje later oppe daag nog get zwaor spul gebracht en Tjeu zoj det waal ins oplaje mèt det mesjien. Hae stardje de moter, ut leecht brandje mer ut apperaat waas neet in beweging te kriege, neet veur of achteroet. "Jè", dacht Tjeu, "den zet ich hum mer oet". Mer auch det lûkdje neet. Noe is ôs vraag; hûbbe ze gewachtj totdet de benzien op waas??



Kaertjes.

Jack vanne Sus zoj veur kaertjes zûrge van Bospop en auch kaertjes mètbringe veur Thea en Eric. Ze haaje bie Tjeu vanne Slechter aafgesproke det-ter ze inne brevebus zoj doen. Ein paar waeke later kumtj Jack bie de bekker binne en zeet

Thea tege hum; "Ich zal dees waek de kaertjes waal effe ophole".

"Jao mer", zeet Jack, "die hûb ich al zeker twee waeke geleje bie uch inne bûs gedaon!". "Wêts-se det waal zeker?" vreugt

Thea, "hûbs-se ze waal op ut gooje hoesnummer inne bûs gedaon?". "Zeker wete", zeet Jack, "gae woeëntj toch oppe

hook en gae hubtj ein brevebus inne deur".

"Nae", zeet Thea, "wae hûbbe gein brevebus inne deur, mer tege de moor vanne graasj".

Thea; "den hûbs-se de kaertjes bie Twan inne bûs gedaon, dae woeëntj oppe hook". Thea ging om zês


oor, wie ze waas aafgewirktj, vlot nao Twan; "zèk Twan,

hûbs-tich kaertjes van Bospop inne bûs gadj?". "Jao", zeet

Twan, "ich vônj al gek det-ze vrieakaertjes oetdeildje. Ich

hûbs-se bie ut aod papeer gegoeëdj". Ut aod papeer

waas gelûkkig nog neet opgehoojdj zoeëdet Thea en Eric toch nao Bospop zeen kinne gaon.



advertentie

LAST VANNE VEUT

Den snel nao Wies,
Toos of Bep



Welk soort?

Sjang van Tis waas aan ut helpe mèt de verseeringe inne kirk. Hae haaj gein greun mieër veur ein of anger bloomstûkske nog sjoeënder te make. Zeet Mientje vanne Vin tege hum; "Gank mer bie ôs op ut landj kieke, dao liktj nog genôg dennegreun in ein paar witte

toete". Ein poeës later

kumtj Sjang trûk mèt twee groeëte conifere!

Die haaj-der ein stûk bove de grôndj aafgezaegtj achter ut stelke aanne

Houtingestraot. De

vraag is noe; hueërtj

Sjang slecht of wêtj-ter ut


versjil neet tûsse ein den

en ein conifeer?



Leeg krat.

Op zaoterdigaovundj kaarte May, Lowie en Jantje van Dekkers dèkker. Jan dacht; "ich kan waal eine bak beer mètnumme". Zeet May; "det is nog ins fijn, mer ich zal dich ein leeg krat mèt trûkgaeve". Zoeë gezagtj zoeë gedaon. Smaondjes is May aan ut werk en sjuutj-ze in eine kieër inne lach. "Waat hûbs-dich", vreugtj ziene collega. Zeet May; "zaoterdig kumtj emes bie ôs mèt ein vol krat beer, dink ich, ich gaef hum ein leeg krat met trûk, en noe vûltj mich in, det dao gein leeg flesse in zotel!". May saoves nao Jan haer en vreugtj; "woeërom zees-tich niks?". Antwoordj Jan; "ich dacht; as-se straks flesse euver hûbs kum-se der vanzelf waal achter!".



advertentie

Hûbtj gae
kabelwerk?
Den is
van Geleuken sterk.



Eindelijk koffie.

De voetbalclub heet ein groeët koffiezètmesjien in ut materiaalhoek geplaatstj om op zaoterdig en zûnjig aan de extra vraag vanne minse te kinne veurzeen. Det dink is gesponserdj door Jean Pierre Eijdens en Frans Maes heet zich mèt get anger leje ontfermdj euver de installatie. Det waas nog eine hieële heksentoer om ins oet te vinje wie det mesjien wirkdje, Frans is-ter genôg mèt aan ut pôngele gewaestj. Op ein gegaeve moment môt dae koffiezètter auch zuver gemaaktj waere. Frans vroeg den eemes durbie en same droge-ze det zwaor dink nao boete om ut om te sjûdde, waat ein gedoons. Gelûkkig haaj Thei det inne gate en zagt tege Frans det-ter ûrges ein kraenke aan zijt om hum leeg te laote laupe! Aldoondje hûbbe-ze det apparaat toch ônger controle gekrege, de hieëre EN de dames, en kinne-wae geniete van ein lekker bekske koffie.




Mieërkeuzevraoge.

Vraag ein.

Woeërôm plükke de minse gaer appele same mèt Hein van Seunis?

- A As de zôn sjientj staon-ze get inne sjeem.
- B As ut rêngeltj staon-ze teminste ein bietje drueëg.
- C As ut weitj staon-ze oet de wintj.
- D As ut gein waer is loestere-ze get nao dae zeiver.



Vraag twee.



Welk vanne ôngerstaondje spraekweurd is good?

- A De koe die Kuil probeertj te stoppe verdeentj ein standjbieëld.
- B Weem ein Kuil prebeertj te stoppe, kumtj mèt ein koe oppe proppe.
- C Doe wets noeëts wie ein koe ein Kuil vinktj.
- D Weem ein Kuil greuftj veur ein koe vûltj neet wiet vanne baum.

Vraag drie.

Woeërôm heet Jan van Linje de veurtuin toch mer in orde gebrachtj?

- A Hae waas det altied al van plan.
- B Hae môst det doon ônger drûk vanne buurt Meuleveldj 1.
- C Hae kriegtj minse op kantoeër, dus môt-det netjes zeen.
- D Boete ômmme koeëj biehaaje kumtj altied as lêste aanne beurt.



Vraag veer.

Woeërôm staon-der zoeëveul hoeze te kaup in Éll?

- A Minse ruke geldj missjien?
- B Éll is auch aan ut vergrieze.
- C Weem wiltj noe in Éll woeëne?
- D In Éll woeëne veul slechte bure.

Vraag vief.

Wat is-ter aanne handj mèt de Kernaovendj?

- A Verlore tied, dus geine aandacht.
- B Weer loestere nao oetstêl van belofes.
- C Weer herhaling van diskussies zeen de minse meug.
- D Oefening wêthaojers van oet de nek zeivere.



De antjwoorde van veurig jaor zeen;

1;B, 2 auch B, 3;D, 4;B+C, 5;C, 6 oeteindelik toch A



advertentie

Zitj gae met de henj inne haor ?




Gaotj den nao SCISSORS & CO



Vekansie inne kop.


Francien van Thijs vanne Bekker môt hel wirke mèt heur hoeshaoje, de bekkerie enne winkel. Ze waas op ein gegaeve moment hieël erg toe aan vekansie. In juli waas alles geregeldj en geboektj en kost Francien neet wachte ôm te vertrêkke. Inne lêste nacht van vriedig op zaoterdig, veur det-se ginge vertrêkke, tok-ze zich stiekum ut vekansierûkske aan en dao euver hêr heure wirksjolk. Toen leep-ze nao de bekkerie woeë Thijs aan ut wirke waas en zagt, "Sjat kiek, ich hûb al half vekansie!". Wat Francien leet kieke weite wae neet, mer hieël Éll haaj dao gaer bie wille zeen, det is zeker.



Ein fieëst.



Eder jaor organizere de medewerkers vanne Éller vastelaovendj ein fieëst veur zichzelf. Anne veuraovendj van ut noewe seizoen bringtj ein committee alle minse oppe bein die ut aafgeloupe seizoen op welke meneer den auch ein biedrage geleverdj hûbbe. Ut committee ônger leiding van Henri haaj get sjoeëns bedacht, namelijk ut Oad Éller Piele Sjete ofwaal 'den OEPS'. Eine variant op ut OLS det wae zoeëgood kinne. Sjutters, marketentsters, keuninge, prinsesse en wat verder nog mèt de sjutterswereldj heet te make verzameldje zich bie de Prairie. Veul oohhh's en aahhh's wore te hueëre wie ut volk binne kwaam, zoeë sjoeën verklèdj wore sômmige. Bie angere veel de pruuk aaf van verbazing. Op ein gegaeve moment, op gezag van federatielid Henri, môste de sjutterieje boete verzamele. Dao wore der ein stûk of 8 mèt hieël toepasselijke name as Sint Anus, Sint Erklaos, Sint en Piet, Sint Emerte, enz. De meiste lachdje get zenewechtig en angere ginge snel stief in ut gelid staon wie jurylid Mart al begos mèt zien werk. Toen auch de bûrdjesdragers ingedeiltj wore zat de optocht zich in beweging richting Siem. Behalve det-ter meziek mèt ging waerdje-der auch op trômmels gehoudj. Dit klônk neet altied aeve harmonieus want dao waas ein trômmel bie sônger vel en de accu veur de meziek dônderdje al ins van ut kerke aaf. Mer det kos de pret neet drûkke. Halverwege ut parkoers, veur ut hoes van Tjeu vanne Kaolder, waas ut defilè. Dao sting jurylid Mart weer te sjrieve dus stief rechtop laupe en strakke gezichte inne richting van Tjeu gedreidj. Den nog gauw eine kieër stiekum zweije en verder gaon richting Siem. Alles waas good aangegaeve mèt bûrdjes dus snel waas ederein op ut terrein vanne doel, det prachtig ômgetoverdj waas as OEPS-terrein mèt federatietent, jurytent, wc's, aettent en neteurlik beertent. Toen ederein verzameltj waas kos ut



sjete beginne. Per sjutterie iêrst twieë proofsjeut en later nog eine kieër drie piele veur de puntje. De doele stinge op waal 15 mèter, veur sômmige toch eine hieële afstandj zoeë bleek. Behalve det aaf en toe de roeës geraaktj waerdje ginge-der auch piele in richtinge die zelfs de helpers vanne handjboog nog noeëts gezeen haaje. Sômmige zègge det Zef vanne Slegter nog gelûk heet gatj det-ter gein piele inne rûk heet gekrege. Al snel waas ut fieëst in volle gang. Bie de beertent en later bie de aettent waas ut ein kômme en gaon van sjuttersvolk. Tûssedoor waerdje allerlei zake ômgerope vanoet de federatietent. Beveurbieëldj as ut pepeer op de dames-wc op waas môst Siem oprave, later kreeg-ter te hueëre det-ter die twieë rolle oppe hieëre-wc auch drek haaj kinne verdeile. Toen Tiny get woeëj vraoge waerdje drek ômgerope det ein klein maedje pappa Evert kwiet waas. Det ging zoeë mer door. Mer ut keure van ut sjoeënste keuningspaar en marketentsters ging neteurlik auch gewoeën door. Jurylid Mart ging-der zelfs veur oppe knieje ôm de ungelste naod vanne rokke te inspektere. Tûssedoor waerdje de wêdstriede gespeuldj veur volle tribunes. De sjutterieje mèt de meiste puntje ginge kavele tot oeteindelik Piet en Sint (neet Sint en Piet) 'den OEPS' wôn. De bekere

stinge al klaor in de priesekaste vanne volleybal- en de handjboogvereniging. Sômmige wore zoeë groeët det-se in stûkke mêtgenome môste waere. Mer ut waas veur alle sjutterieje eine geweldige aovendj dae nog lang doordje.



Wisj-djer al det ..

- o woeëne op Niesgoet deurder is as det-se dachte
- o veul van die bewoeëners biebeune
- o inne hook van ut plein bie de friettent ein hangplek is veur de jeugd
- o aanne angere kantj bie de dokter ein hangplek is veur de aoj
- o Marlies en Paul inne advertentie (Kontaktblad) van heur fieëst haaje staon : "i.p.v. kaarten"
- o der dus auch neet is gekaartj gewore dae aovendj
- o Giel van Heine neet good tege beer kan
- o der eder kieër get kepot vaeltj as-ter heives geit mèt de fiets
- o Leen van Sjang heur steul nog ins good heet nao gekeke
- o Mia bie ut kaarte door eine stoel haer waas gezaktj
- o Wim en Miek inne veurige Kwakel aan ut steggele wore euver ut iêst opa en oma waere en zoeë
- o Wim en Mia noe veur de twieëdje kieër opa en oma zeen gewore
- o wae vanne redaksie noe aan ut steuke zeen
- o Piet vanne Haas te voet mèt de kruker sjrot ging bringe nao de gemeindje in Hunsel
- o hae ôngerweges mer 6 kieër gestoptj waas ôm effe rondj te kieke, neet ôm te ruste
- o Roy good meug waas tiejes ein vanne Bôntje Aovendje
- o hae op ein gegaeve moment laag te slaope en det-se hum noe bras-muzikant numme

Weurdje vanne redaksie

Auch op Kwakel nummer 51 hûbbe-wae weer good ôs bèst gedaon zoeë-as gae gemerktj hûbtj. Ut is weer ein hieël book gewore ômdet-ter gelûkkig nog minse ônger ôs zeen die aaf en toe 'inne pen klumme'. Uch gooj biedrages, op welke meneer den auch, stêlle-wae erg op pries en inne regel kinne-wae alle stûkskes plaatse. Hertelik bedanktj en tot de volgendje kieër mer weer!



De Kwakel is ein oetgave van ut Kwakelcomité;

Thea van Bommel, Jeanne Corsten, Paul Custers, Corrie Koolen, Jean de Louw en Hub Peeters

Vormgaeving;

Paul Custers en Huub Sentjens



Proklamasie van Jeugdprins Luuk en Jeugdprinses Lisan

Wae, prins Luuk en prinses Lisan,
verklaore in het bieëzen
van uch allemaol det:

Ich, prins Luuk,
Zoon van Frans van Sjoteles en Paul vanne Sjilder,
kleinzoon vanne ieërste prins, vorst en
groeëtvorst vanne Moerebuuk

Woeëne doon ich oppe Scheijvenstraat,
de deurst en bèst verleegdje straat van Ell,
saame mèt ôs pap, mam en mien broor Rick

Jôngste broor van Rick,
woeë ich het good mèt kan vinje,
mer nog lang neet alles van pik

Trômme, darte en kompjoetere doon ich gaer
en neet allein mèt slecht waer

Ich, prinses Lisan,
dochter van Hans, geboore as Ûlewapper,
en Marlies, geboore as Brikkebekker

Geboore bin ich oppe Niesstraat
en noeë hoeës ich oppe Breederkamp,
saame mèt ôs pap, mam en mien zûsterke Iris

Zûster van Iris,
die waal jônger is, mer toch sôms maentj
det ze get mieër is

Zwûmme doon ich bie de lezere Man,
laeves redde en mieëne tieëd verbaetere
Zoeë snel as ich kan



Wae maake saame ôs lêste jaor oppe sjoel hie vol
Woeë wae het ongerein good kinne vinje, mer veur Sjaak en Susan is het dèk te dol
Dus heilig waere zitj-der veur ôs neet mieër in
Mer in ein fietsbedevaart nao Heppenaer hûbbe wae waal zin



Zônger voetbal kan ich neet laeve,
daorum doon ich mich in de D1 as spits hieël gaeve

Met het meidenteam voetbal ich op het veldj en inne zaal,
winne doon wae nog neet veul,
Mer mèt oeëne trainer kômme wae der waal

Mèt Rick en Kristel as adjudante blijft der neemes aane kantj.
Dus wae wete woeë wae de bal môtte raake
En zulle probeere dees daag in het Moerlandj d'r get sjoëns van te maake

En det doon wae ônger ôs motto:



**Laotj de bal mer rolle
En kômptj mèt ôs drie daag dolle**



Jeugdboontje-middig en jeugdprinses-bal

Veur het ieërst in ein groeët aantal jaore is d'r eine jeugdboontje-middig gehaoje. En waat veur eine! Mer leefst 15 optraejes door 40 kinjer inne laeftieëd van zoeë ongeveer 4 of 5 jaor t/m 14 of 15 jaor. De optraejes woore hieël gevarieerdj, playback, dan's, drum, live gezonge leedjes en sketches. Duudelik waas te zeen det eederein lang en hel geoeffendj haaj. En det eederein auch de groeëtste lol haaj. Eine hieël geslaagdje middig. Wae hûbbe aafsjeid genoome van jeugdprins Dirk en jeugdprinses Daniëlle, die mètte Euro ômmenek, neet drie daag, mer ein hieël jaor gek gedaon hûbbe. Het hoeëgtepuntj waas het oetroope vanne noewe jeugdprins en jeugdprinses. Oet de gaol kwoome Luuk en Lisan, die het hieël jaor zulle regeere onger heur motto: **Laotj de bal mer rolle en kômptj mèt ôs drie daag dolle!**





Wae winse uch
eine plezeerige
vastelaovundj!